

Di acuerdo cu Ministro Eddy Croes; TRECE MEHORACION DEN ENSEÑANZA TA E CAMBIO MAS RADICAL DI EPB

ORANJESTAD (AAN) -- Ministro di Enseñanza, Sr. Eddy Croes, den entrevista cu DIARIO ta splica pakico e ta considera un logro grandisimo cu muchanan di entre 12 pa 15 aña di edad cu drenta EPB ta haya e oportunidad di bay hunto den un periodo di dos aña di formacion basico, y tambe e mandatario ta splica pakico e programa di estudio pa EPB ta practico. Na prome lugar e mandatario ta indica cu den e grupo grandi di estudiante cu ta drenta EPB, logicamente tin diferente tipo di alumno, unda cu no tur por yega na e

mesun nivel, y pesey nan ta haya e dos añanan di educacion profesional basico na diferente nivel.

Importante ta cu si pa un otro motibo tin alumnonan cu mester stop prome cu drenta den educacion profesional mas avanza, nan a haya caba un bon formacion basico, di manera cu nan tin un base riba cual nan por sigui despues si nan kier, pa bay den estudio mas avanza. Esey ta e ventaha grandi cu tin na EPB, di acuerdo cu e titular di e cartera di Enseñanza.

Tambe e mandatario ta indica cu e cambio mas radical cu

EPB a trece cune ta e mehoracion den enseñanza, compara cu loke tabata e caso antes, den e 4 añanan cu e nivelnan enseñanza vocacional tabata separa for di otro.

"Mi ta kere cu loke ta pasando aworaki den e proceso di EPB ta un logro basta grandi y un mehoracion basta grandi den enseñanza", e titular ta bisa.

Tambe e ta indica cu naturalmente no tur cos ta cien por ciento na EPB, loke e tambe sa.

"Pero na momento cu bo bisa cu e no ta cien por ciento y bo ta lague asina, e ora ey bo ta robes", pero esey no ta e caso, segun e mandatario, kende, al contrario, ta señala cu tin un trabao diario ta tumando lugar pa EPB bira cien por ciento exitoso.

"E lesnan cu te ainda no ta totalmente adapta na e sistema, mester yega asina leu; e muchanan mester haya mas guia durante nan estudio, y riba e aspectonan aki ta worde traha aworaki".

Ministro Eddy Croes ta haci enfasis cu gobièrno no a forma e school aki bente eynan y lague para, pero mas bien e ta worde guia y e lo sigui worde guia.

"Pero no EPB so. Tin cambianon cu nos ta bay trece den e otro tiponan di enseñanza (prescolar, basico y secundario) cu lo bay haya un guia special, pasobra nos ta trahando cu yiu di hende; nos ta trahando pa un cambio pa mehor; nos no ta trahando riba un cambio pa peor. Pues e enseñanza cu nos ta bay crea mester bira un enseñanza mehor cu e tabata y esey ta nifica cu e hobennan cu drenta school lo haya un mehor formacion di nan mes, cu nan tabata haya antes".

PROGRAMA PRACTICO

Ministro Eddy Croes ta lamenta cu por tin criticanan negativo ta sali afo, rond di EPB, pasobra esey no ta motivante. Sinembargo e ta satisfecho cu e fundacion EPB tin hopi estimulo pa sigui dilanti y cu nan ta haciendo un gran trabao. E mandatario su punto di bista ta cu tur esnan cu tin critica, specialmente si ta trata di hende cu ta paden "cu ta cerca di e candela" y cu supuestamente mester sa me-

hor, lo ta bon pa nan bisa e motibo di nan criticanan y riba cual argumentonan nan ta basa.

Por ehemplo, si nan no ta di acuerdo cu EPB a worde prepara pa haci dos aña basico y dos aña profesional pero mas bien pa facie cuatro aña profesional, anto basa riba cual argumento nan ta pensa asina.

"Nos tin argumento pa bisa pakico nos a opta pa agrupa tur e hobennan cu ta bay den e direccion di profesional pa nan bin hunto, pa nan haya e formacion igual basico, y pa despues nan haya e formacion

profesional den e direccion cu nan ta scoge. Esun cu kier sigui un formacion tecnico ta haya un posibilidad pa scoge esaki".

Den e sentido aki e mandatario ta reitera cu e programa di studio aki a worde prepara conhuntamente cu sector priva.

"Nos a papia cu tur e hendenan aki, sinta cu nan na mesa, y bisa nan cu nos tin un formacion di dos aña profesional, unda nos a puntra kico (p.e) kico un mecanico y/of un electricista mester sa pa e tin e nivel necesario ora cu e caba cu su estudio, y cu di acuerdo cu esey nan mester a hinca e vaknan cu nan mester sa pa caba EPB na e nivel profesional basico", y esaki ta e motibo pa cual e programanan di enseñanza di EPB ta practico, di acuerdo cu loke a mandatario ta indica.

PARTICIPACION DEN PARADA NA PLAYA A SIGUI CAY

Segun e lista di salida publica pa SAC cu cifranan di inscripcion di gruponan y individuonan, mester a participa den parada di playa segun e lista aki 1912 persona, pa parada grandi na Oranjestad.

Sinembargo segun cifranan copila pa Juby Naar, di datonan duna durante parada di parti di lidernan di grupo, e total di participacion tabata 2019.

Esaki ta encera 1933 riba caya di e gruponan, 31 reina cu prins y pancho riba caya y den jeep, y 45 participante riba e carosanan.

Tin grupo inscribi cu no a participa y otronan cu a participa cu mas hende cu a inscribi of poco menos.

E total di gruponan na Playa (individualnan no ta conta como grupo, ni ta conta dos grupo comercial di venta durante parada) cu a participa den parada tabata 21.

Nan ta: Grupo cu Reina di Carnaval, cu reina juvenil, Spiritual sky of the Birds, Jumping Jewels, Egyptian Fantasy, Camacury, HOFFIE Prikitch, Coastal cu Rituals and Dances, Los Laga Bay, Dancing Clowns, Tiki Loco, Nos tey Atrobe, Mascarada, Santo Domingo, Mariniers, Hospilolies, Paraloco, La Cabana, Womens Club cu AIDS, Rattenvangers, Sneeuwuitje.

Na 1994 tabata tin den parada 23 grupo, na 1995 un total di 22 di Aruba (3 di Venezuela ademas).

Na 1994 tabata tin inscribi 3392 a participa 3401, na 1995 a inscribi 241 y a participa 2893 (di cualnan 2493 tabata di Aruba y e resto di Venezuela)

MUSICA DEN PARADA

Na 1994 tabata tin 15 banda musical, 4 brassband 2 steelband y 11 Soundsystem den parada. Aña pasa e bandanan musical a cay pa 12, steelband a cay pa 1, soundsystems a cay pa 8 y brassband 5 di Aruba (3 di Venezuela). E aña aki a participa den parada 12 banda musical cu tabata: Dushi band, Los Duques, Oreo, Taxx, Quasi, Eco, Robert SSBS, Kenny Clay, Cheerband, The Original band, Tigo, Eclipse. E total di personanan riba e trucknan di bandanan tabata 175.

Tambe a participa 4 brassband, Energy, Unity, College Girls y DTU-365 cu un total di 140 tocador y 6 cheerleader. Discotecanan of Soundsystems e aña aki den parada tabata 6.

CAROSA Y ROADPIECE

Si sigui riba e cifranan di carnaval pa locual ta carosa y roadpiece, nos ta ripara cu e aña aki den parada na Playa tabata tin 16 carosa cu ta 1 menos cu aña pasa y 5 mas cu na 1994.

E total di roadpiecenan e aña aki tabata 37 cu ta 11 menos cu 1995 y 42 menos cu na 1994.

E aña aki no a registra bodypiece, shoulderpiece y handpiece ya cu na salida na San Nicolas caba (sabiendo cu e mes gruponan lo tana playa) a muestra cu esaki lo ta masha poco segun e "temanan" di e gruponan e aña aki.

Registro Civil

PROXIMO CASAMENTONAN

ORANJESTAD (AAN): Esaki ta e lista oficial di Registro Civil di siman pasa, cu a cera Diasabra 17 di Februari 1996 pa 12'or di merdia di e parehanan cu a inscribi pa pronto drenta enlace matrimonial.

• • Miguel Antonio Nadall di 28 aña biba na Aruba, lo casa cu Monique Mennen di 27 aña biba na Aruba.

• • Eugene Junior van der Biezen di 30 aña biba na Aruba, lo casa cu Catharina Violeta Kock di 28 aña biba na Aruba.

• • Rafael Gustavo Odor di 24 aña biba na Aruba, lo casa cu Natividad Aurora Barreto-Roa di 30 aña biba na Aruba.

• • Ricardo Alberto Llanes-Fuentes di 22 aña biba na Aruba, lo casa cu Tamara Melissa Gomez di 23 aña biba na Aruba.

• • Harry Gerhardus van Reek di 24 aña biba na Aruba, lo casa cu Andrea Helena van Hooff di 27 aña biba na Aruba.

• • German Benjamin Silverio di 35 aña biba na Aruba, lo casa cu Nelsy Antonia Cardena-Molina di 38 aña biba na Aruba.

• • Rodolfo Claudio Todd di 30 aña biba na Aruba, lo casa cu Sjoerdje De Kleine di 32 aña biba na Aruba (Sjoerdje tabata casa caba cu Rudolfo Romuro Geerman).

• • Ivan Francis Britten di 23 aña biba na Aruba, lo casa cu Cheryl Rampersaud di 23 aña biba na Aruba.

• • Ivo Andre Dongen di 30 aña biba na Aruba, lo casa cu Gwenny Atalie Croes di 28 aña biba na Aruba.

• • Leonard Paul Tuccelli di 28 aña biba na Aruba, lo casa cu Iliana Martha Amador-Varela di 20 aña biba na Santa Martha, Colombia.

• • Eldrid Frensel Danies di 27 aña biba na Aruba, lo casa cu Veroushka Georgina Maria Bareño di 23 aña biba na Aruba.

• • Godefridus Willem Christina Maria Brouwers di 31 aña biba na Berg en Dal, Hulanda, lo casa cu Carolina Peters di 33 aña biba na Aruba.

• • Rivelino Benito Sabajo di 23 aña biba na Aruba lo casa cu Vanessa Mavis Wattameleo di 18 aña biba na Aruba.

• • Filomeno Arsenio Marchena di 42 aña biba na Aruba, lo casa cu Ruth Inses Herrera-Botero di 25 aña biba na Aruba.

• • Etienne Michel de Lannoy di 26 aña biba na Aruba, lo casa cu Caroline Jessamine Hart di 20 aña biba na Aruba.

• • Eric Andres Koolman di 25 aña biba na Aruba, lo casa cu Ilva Endira Geerman di 21 aña biba na Aruba.